

## UPPĀTASANTI GĀTHĀ

Composed by Phra Mahāmaṅgalasīlavamṣa, Wat Jotikārāma, Chiang Mai, during the reign of Tilokarāja (1442-1487), eleventh king of the Mangrai Dynasty.

Burmese Pali script edited by Sayādaw U Dhammānanda, Wat Tha Ma O, Lampang.

Pali romanization and English translation (forthcoming) by Phra Dhammānando, Asom Thammaratik Mae Soon, Chiang Mai.

---

Namo tassa bhagavato arahato sammāsambuddhassa

*Ganthārambha (Introductory Verses)*

(ka)

Sududdaso ayam dhammo lokattham jinadesito  
Mahāsantikaro loke sabbasampattidāyako ||

(kha)

Sabbuppātūpasamaṇo bhūtayakkhanivāraṇo  
Akālamaccusamaṇo sokarogavināsano ||

(ga)

Paracakkapamaddano rañño vijayavaḍḍhano  
Sabbāniṭṭhaharo santo dhammam vakkhāmi bhūtato ||

(gha)

Vatthuttayassa yo yattha samvāṇeti gunuttame  
Tassa tattha sukhārogya-sotthiyo honti sabbadā ||

## **Praising the Twenty-Eight Buddhas**

### *The Four Buddhas of the Sāramaṇḍa Kappa*

1.

Taṇhaṅkaro mahāvīro sabbalokānukampako  
Vantasaṁsāragamano sabbakāmadado sadā ||

2.

Sabbābhībhū sabbavidū sabbadevagaruttamo  
Sabbāsavaparikkhīṇo sadā sotthim karoti no ||

3.

Varalakkhaṇasampanno medhaṅkaro mahāmuni  
Jutindharo mahāsirī suvaṇṇagirisannibho ||

4.

Dibbarūpo mahākāyo mahānātho mahabbalo  
Mahākāruṇiko satthā mahāsantiṁ karoti no ||

5.

Mahāmohatamam hantvā yo nātho saraṇaṅkaro  
Devādevamanussānam lokānañca hitaṅkaro ||

6.

Byāmappabhābhircito nigrodhaparimaṇḍalo  
Nigrodhapakkabimbotṭho sadā sotthim karoti no ||

7.

Asītiratanubbedho dīpaṅkaro mahāmuni  
Pabhā niddhāvate tassa ṭhāne dvādasa yojane ||

8.

Vassassatasahassāni ṭhatvā loke vināyako

Lokālokakaro satthā sadā sotthim̄ karoti no ||

*The One Buddha of the Sāra Kappa*

9.

Aṭṭhāsītihatthubbedho konḍañño nāma nāyako  
Sabbadhammehi asamo sabbapāramitāgamo ||

10.

Vassassatasahassāni āyu tassa mahesino  
Mocetu so sabbabhayañ sadā sotthim̄ karoti no ||

*The Four Buddhas of the Sāramanḍa Kappa*

11.

Aṭṭhāsītiratanāni accuggato jutindharo  
Mañgalō nāma sambuddho navutisahassāyuko ||

12.

Chabbañṇaramsiyo dasa sahassalokadhātuyo  
Pharantā tassa chādenti esa sotthim̄ karoti no ||

13.

Navutiratanubbedho sumano nāma nāyako  
Kañcanācalasañkāso navutisahassāyuko ||

14.

Upeto buddhaguñehi sabbasattahitesako  
Karoti no mahāsantiñ ārogyañca sukham̄ sadā ||

15.

Asītiratanubbedho saṭṭhīsañhassa-āyuko  
Revato nāma sambuddho sabbalokuttaro muni ||

16.

Tassa sarīre nibbattā pabhāmālā anuttarā

Pharantā yojane niccam̄ sadā sotthim̄ karotu no ||

17.

Sobhito nāma sambuddho navutisahassāyuko  
Saṁsārasāgare satte bahū moceti dukkhato ||

18.

Atṭhapaññāsaratanam̄ accuggato mahāmuni  
Obhāseti disā sabbā sadā sotthim̄ karotu no ||

*The Three Buddhas of the Vara Kappa*

19.

Anomadassī sambuddho tejassī duratikkamo  
Atṭhapanñāsaratano obhāsento sadevake ||

20.

Nibbānapāpako loke vassassatasahassāyu  
Karotu no mahāsantiṁ sukhitā ca mayam̄ sadā ||

21.

Padumo nāma sambuddho lokajetṭho narāsabho  
Atṭhapaññāsaratano ādiccova virocati ||

22.

Vassassatasahassāni āyu tassa mahesino  
Sopi buddho kāruṇiko sadā sotthim̄ karotu no ||

23.

Atṭhāsītiratanubbedho nārado sabbakāmado  
Nirantaram̄ divārattim̄ yojanam̄ pharate pabhā ||

24.

Navutivassasahassāni ṭhatvā loke vināyako  
Moceti dukkhato satte sopi sotthim̄ karotu no ||

*The One Buddha of the Sāra Kappa*

25.

Aṭṭhapaññāsaratanō padumuttaro mahāmuni  
Tassa pākatikā rāmsī pharanti dvādasa yojane ||

26.

Vassassatasahassāni ṭhatvā lokematandado  
Moceti bandhanā satte sopi pāletu no sadā ||

*The Two Buddhas of the Maṇḍa Kappa*

27.

Aṭṭhāsītiratanāni accuggato mahāmuni  
Sumedho nāma sambuddho navutisahassāyuko ||

28.

Tassa pākatikā rāmsī pharanti yojanām sadā  
Pāletu no sadā buddho bhayehi vividhehi ca ||

29.

Paññāsaratanubbedho sujāto nāma nāyako  
Hemavanṇo mahāvīro mahātamavino dano ||

30.

Navutivassasahassāni āyu tassa mahesino  
Sopi buddho kāruṇiko sadā sotthim karotu no ||

*The Three Buddhas of the Vara Kappa*

31.

Asītiratanubbedho piyadassī mahāmuni  
Navutivassasahassāni ṭhatvā lokagganāyako ||

32.

Sopi sabbagūṇūpeto sabbalokasukhappado

Sabbadosam̄ vināsento sabbam̄ sotthim̄ karotu no ||

33.

Asītiratanubbedho atthadassī narāsabho  
Vassassatasahassāni loke aṭṭhāsi nāyako ||

34.

Tassa pākatikā ramśī pharanti yojanam̄ sadā  
Nirantaram̄ divārattim̄ nātho sotthim̄ karotu no ||

35.

Dhammadassī ca sambuddho asītihatthamuggato  
Atirocati tejena sadevāsuramānuse ||

36.

Vassassatasahassāni ṭhatvā loke mahāyaso  
Sabbasatte pamoceti bhayā rakkhatu no sadā ||

*The One Buddha of the Sāra Kappa*

37.

Siddhattho nāma sambuddho satṭhiratanamuggato  
Tibhave sotthijanako satassahassa āyuko ||

38.

Samśārasāgarā loke santāretvā sadevake  
Nibbāpesi ca so satthā sadā sotthim̄ karotu no ||

*The Two Buddhas of the Maṇḍa Kappa*

39.

Satṭhiratanamubbedho tisso lokagganāyako  
Anūpamo asadiso atulo uttamo jino ||

40.

Vassassatasahassāni āyu tassa mahesino

Ārogyañca mahāsukham hotu no tassa tejasā ||

41.

Aṭṭhapaññāsaratanō phusso lokagganāyako  
Janambujam vibodhento nibbāpento sadevake ||

42.

Navutivassasahassāni ṭhatvā loke mahāyaso  
Uddharanto bahū satte sadā sotthim karotu no ||

*The One Buddha of the Sāra Kappa*

43.

Asītiratanubbedho vipassī lokanāyako  
Pabhā niddhāvate tassa samantā satta yojane.|

44.

Sopi devamanussānam bandhanā parimocayi  
Asītisahassāyuko nātho sotthim karotu no ||

*The Two Buddhas of the Maṇḍa Kappa*

45.

Sattatīhatthamubbedho sikhī nāmesa nāyako  
Pabhā niddhāvate tassa samantā yojanattaye ||

46.

Sopi atulyo sambuddho sattatīsaḥassāyuko  
Karotu no mahāsantiṁ sukhitā ca mayam sadā ||

47.

Vessabhū nāma sambuddho hemarūpasamūpamo  
Satṭhiratanamubbedho satṭhī ca sahassāyuko ||

48.

Brahmadevamanussehi nāgāsuradijehi vā

Pūjītopi sadā nātho sadā sotthim̄ karotu no ||

*The Five Buddhas of the Bhadda Kappa  
(Three of the Past)*

49.

Tālīsaratanubbedho kakusandho mahāmuni  
Tassa kāyā niccharanti pabhā dvādasa yojane ||

50.

Cattālīsasahassāni tassa āyu anuttaro  
Karotu so sadā nātho āyum̄ sukham̄ balañca no ||

51.

Konāgamana sambuddho tiṁsahatthasamuggato  
Tiṁsavassasahassāni āyu tassa mahesino ||

52.

Dhammāmatena tappetā devasañgham̄ surālaye  
Mahītale ca janatam̄ sadā sotthim̄ karotu no ||

53.

Kassapo nāma sambuddho dhammarājā pabhañkaro  
Viśatīhatthamubbedho viśassahassa-āyuko ||

54.

Anūpamosamasamo devasatthā anuttaro  
Karotu no mahāsantim̄ ārogyañca jayañ sadā ||

*(One of the Present)*

55.

Aṭṭhārasahatthubbedho gotamo sakkayavadḍhano  
Sabbaññū sabbatilako sabbalokasukhappado ||

56.

Sambuddho sabbadhammānam bhagehi bhāgyavā yuto  
Vijjācaranāsampanno sotthyārogyam dadātu no ||

57.

Abbhātītā ca sambuddhā anekasatakoṭiyo  
Sabbalokamabhiññāya sabbasattānukampino ||

58.

Sabbaverabhayātītā sabbalokasukhappadā  
Sabbadosam vināsentā sabbasotthim karontu no ||

*(One of the Future)*

59.

Anāgate ca sambuddho metteyyo devapūjito  
Mahiddhiko mahādevo mahāsantim karotu no ||

*Paccekabuddhas*

60.

Sabbe paccekasambuddhā nirodhajhānakovidā  
Nirālayā nirāsaṅkā appameyyā mahesayo ||

61.

Dūrepi vineyye disvā sampattā taṅkhaṇena te  
Sandīṭṭhikaphale katvā sadā santim karontu no ||

*The Nine Lokuttara Dhammas and Pariyatti Dhamma*

62.

Svākkhātādisampanno dhammo sapariyattiko  
Saṃsārasāgarā loke tāreti jinagocaro ||

*The Saṅgha Ratana*

63.

Kilesajālaviddhamī visuddho buddhasevito  
Nibbānagamano santo sadā sotthim̄ karotu no ||

64.

Silādiguṇasampanno saṅgho maggaphale ṭhito  
Jitindriyo jitapāpo dakkhiṇeyyo anuttaro ||

65.

Anāsavo parisuddho nirāsāso bhavābhave  
Nibbānagocaro santo sadā sotthim̄ karotu no ||

*The Hundred-and-Eight Great Theras*

66.

Aññātakonḍaññatthero rattaññūnam aggo ahu  
Dhammadakkābhisaṁmaya sadā sotthim̄ karotu no ||

67.

Vappatthero mahāpañño mahātamavinodano  
Mahāsantikaro loke mahāsantiṁ karotu no ||

68.

Bhaddiyo bhaddasilo ca dakkhiṇeyyo anuttaro  
Lokaṭṭhacarito theroy sadā sotthim̄ karotu no ||

69.

Mahānāmo mahāpañño mahādhammavidū suto  
Mahākhīṇāsavo theroy mahāsantiṁ karotu no ||

70.

Assajitthero mahāpañño jitamāro jitindriyo  
Jitapaccatthiko loke sadā sotthim̄ karotu no ||

71.

Anupubbikatham sutvā yaso ekaggamānasō  
Aggadhammamanuppatto sotthārogym dadātu no ||

72.

Catvādhikā ca paññāsa therā gihisahāyakā  
Patvāna paramam̄ santim̄ sadā sotthim̄ karantu no ||

73.

Ye tiṁsa bhaddavaggiyā rūpenātulavaṇṇino  
Khīṇāsavā vasībhūtā te karantu anāmayam̄ ||

74.

Uruvelakassapopi mahāparisānamuttamo  
Thapito aggaṭṭhānamhi sadā sotthim̄ karotu no ||

75.

Yo nadīkassapatthero puññakkhetto anuttaro  
Sasaṅgho sīlasampanno sadā sotthim̄ karotu no ||

76.

Dhammapajjalito santo yo thero gayākassapo  
Samyutto bhavanisnehe sadā sotthim̄ karotu no ||

77.

Lokanātham̄ ṭhapetvāna paññavantāna pāṇinam̄  
Paññāya sāriputtassa kalam̄ nāgghati soḷasim̄ ||

78.

Sāriputto mahāpañño paṭhamo aggasāvako  
Dhammasenāpatī seṭṭho sadā sotthim̄ karotu no ||

79.

Pādaṅgulikamattena vejayantapakampano  
Paṭhavim̄ mahatim̄ sabbam̄ samattho parivattitum̄ ||

80.

Moggallāno mahāthero dutiyo aggasāvako  
Iddhimantānam̄ so aggo sadā sotthim̄ karotu no ||

81.

Mahākassapattheropi uttattakanakannibho  
Dhutagunaggaṇikkhitto tatiyo satthusāvako ||

82.

Araññavāsābhirato paṁsukūladharo muni  
Sugatassāsanadharo sadā sotthim karotu no ||

83.

Āpatti-anāpattiyā satekicchāya kovidō  
Vinaye agganikkhitto upāli satthuvaṇṇito ||

84.

Vinaye pāramippatto vinayaggocaro muni  
Karotu no mahāsantim sotthyārogyam dadātu no ||

85.

Anuruddhamahāthero dibbacakkhūnamuttamo  
Ñātisetṭho bhagavato sotthyārogyam dadātu no ||

86.

Uccākulikānaṁ aggo bhaddiyo susamāhito  
Kāligodhāya putto ca sadā sotthim karotu no ||

87.

Ānando buddhupaṭṭhāko saṅgītisādhusammato  
Bahussuto dhammadharo sadā sotthim karotu no ||

88.

Kimilo sirisampanno mahāsukhasamappito  
Mahākhīṇāsavo jāto mahāsantim karotu no ||

89.

Garuvāsaṁ vasitvāna pasanno buddhasāsane  
Bhagu cārahataṁ patto sadā sotthim karotu no ||

90.

Kulappasādajanako kāludāyī mahiddhiko  
Etadaggatthito therō sadā sotthim karotu no ||

91.

Settho dhammakathikānam tiṇṇam vedāna pāragū<sup>5</sup>  
Puṇṇo mantāniyā putto therō sotthim karotu no ||

92.

Bhāradvājo mahāthero sīhanādānamuttamo  
Thapito aggaṭṭhānamhi sadā sotthim karotu no ||

93.

Saṅkhittabhāsitamattham vitthārena vijānako  
Kaccāno bhavanisneho therō sotthim karotu no ||

94.

Lakuṇṭabhaddiyo therō mañjussarānamuttamo  
Thapito aggaṭṭhānamhi sadā sotthim karotu no ||

95.

Araṇavihārinam aggo dakkhiṇeyyo anuttaro  
Subhūti bhūtadamanō therō sotthim karotu no ||

96.

Araññavāsinam aggo revato khadiravaniyo  
Vivekābhīrato therō sadā sotthim karotu no ||

97.

Jhāyinam uttamo therō kañkhārevatanāmako  
Samādhijjhānakusalo sadā sotthim karotu no ||

98.

Soṇo ca koṇivīsopi āraddhavīriyānamuttamo  
Pahitatto sadā therō sotthim phāsum karotu no ||

99.

Kalyāṇavākkaraṇānaṁ soṇo kuṭikaṇṇopi ca  
Aggoti vaṇṇito therō sotthim phāsum karotu no ||

100.

Lābhīnamuttamo therō sīvali iti vissuto  
So rato paccayādimhi sadā sotthim karotu no ||

101.

Saddhādhimuttānaṁ aggo vakkali iti nāmako  
Pāmojjabahulo therō sadā sotthim karotu no ||

102.

Rāhulo buddhaputtopi sikkhākāmānamuttamo  
Dāyādo sabbadhammesu mahāsantim karotu no ||

103.

Saddhāya pabbajitvāna raṭṭhapālo parakkamī  
Etadagge ṭhitoyeva sadā sotthim karotu no ||

104.

Kuṇḍadhāno mahāthero salākam paṭhamam gato  
Ṭhapiroyeva ṭhānamhi sadā sotthim karotu no ||

105.

Paṭibhāṇavantānampi aggoti buddhavaṇṇito  
Vaṅgīso arahā setṭho sadā sotthim karotu no ||

106.

Samantapāsādikānaṁ aggaṭṭhānamhi ṭhapito  
Upaseno vaṅgantaputto sadā sotthim karotu no ||

107.

Dabbo mallaputto therō senāsanapaññāpako  
Ṭhapito aggaṭṭhānamhi sadā sotthim karotu no ||

108.

Pilindavacchasamaṇo devatānam piyo ahu  
Ṭhapito aggaṭṭhānamhi sotthyārogyam dadātu no ||

109.

Bāhiyodārucīriyo khippābhiññānamuttamo  
Karotu no mahāsantim ārogyañca jayam sadā ||

110.

Kumārakassapatthero cittakathīnamuttamo  
Micchāvitakkupacchedo sadā sotthim karotu no ||

111.

Paṭisambhidāpattānam aggaṭṭhānamhi ṭhapito  
Koṭṭhito arahā setṭho sadā sotthim karotu no ||

112.

Appābādho mahāthero appābādhānamuttamo  
Bākulo arahājāto sadā sotthim karotu no ||

113.

Pubbenivāsavedīnam aggoti buddhavaṇṇito  
Sobhito nāma so thero sadā sotthim karotu no ||

114.

Mahākappinattheropi bhikkhu-ovādako ahu  
Kusalo ovādadāne sadā sotthim karotu no ||

115.

Bhikkhunovādakānaggo nandako iti vissuto  
Pāletu no sadā thero sotthim phāsum karotu no ||

116.

Indriyesu guttadvāro aggaṭṭhāne ṭhito ahu  
Nandatthero vasippatto sadā sotthim karotu no ||

117.

Tejodhātukusalānam aggaṭṭhānamhi ṭhapito  
Sāgato nāma so therō sotthim phāsum karotu no ||

118.

Saññāvivatṭakusalo padhāno bhāvanārato  
Buddhasisso mahāpantho mahāsantim karotu no ||

119.

Cūlapanthakattheropi manomayābhinimmito  
Ṭhapito aggaṭṭhānamhi sadā sotthim karotu no ||

120.

Patibhāṇeyyakānam tu aggaṭṭhānamhi ṭhapito  
Rādho therō mahāsotthim karotu no anāmayam ||

121.

Lūkhacīvaradharānam bhikkhūnam uttamo ahu  
Mogharājamahāthero mahāsantim karotu no ||

122.

Vimalo vimalappañño surūpo susamāhito  
Rajo na limpati khandhe mahāsantim karotu no ||

123.

Dhammapālo mahāpālo mahādhammadharo yati  
Mahākhīṇāsavo loke mahāsantim karotu no ||

124.

Cakkhupālo mahāthero padhāno sīlasamvuto  
Pahitatto mahākāyo mahāsantim karotu no ||

125.

Sabbaverabhayātīto nārado āsavakkhayo  
Mahāsantikaro loke sadā sotthim karotu no ||

126.

Buddhapūjāya nirato jinabhattiparāyano  
Saddhammasavano thero sadā sotthim karoti no ||

127.

Pacchimabhasampatto gotamo bhāvanārato  
Rāgakkhayamanuppatto sadā sotthim karoti no ||

128.

Senāsanesu sappāyam laddhā jhānam samārabhi  
Godhiko buddhajhāyanto sadā sotthim karoti no ||

129.

Buddhe pasannamānaso subāhu añjalikato  
Khīṇāsavo vasībhūto mahāsantim karoti no ||

130.

Vipassanāya pasuto valliyo susamāhito  
Sato jhāyī vanevāsī sadā sotthim karoti no ||

131.

Uttiyo vinayadharo atikkanto narāmare  
Dhārento antimam deham sadā sotthim karoti no ||

132.

Vimalo virajojallo jāto pañdaraketunā  
Bimbisāraddhajo thero sadā sotthim karoti no ||

133.

Rammāraññe vasitvāna bhāvento kusalam bahum  
Yogakkhemamanuppatto sabhiyo santim karoti no ||

134.

Pubbenivāsam jānanto dibbacakkhuvisodhano  
Nāgitorahatam patto sotthyārog Yam dadātu no ||

135.

Pātimokkhamanuppatto vijayoraññagocaro  
Lābhālābhī tathāsaṁsī sadā sotthim karoti no ||

136.

Taṇhājaṭam vijatetvā vadḍhetvāna vipassanam  
Saṅgharakkhito mahāthero mahāsantim karoti no ||

137.

Araññavāsābhirato bhavanettisamūhato  
Dhammānam pāramippatto uttaro pātu no bhayā ||

138.

Pubbe puññāni katvāna pubbayogam samārabhi  
Usabhorahataṁ patto sadā sotthim karoti no ||

139.

Samāpattisamāpanno chaṭabhiñño mahiddhiko  
Sivako buddhajhāyanto sadā sotthim karoti no ||

140.

Sattāriyadhano thero dhaniyo dhammasāgaro  
Vantasaṁsāragamano sadā sotthim karoti no ||

141.

Pañcakkhandhe pariññāya bhāvayitvāna nibbutim  
Pattvāna paramam santim posiyo pātu no bhayā ||

142.

Upanissayasampanno ujjayo buddhamāmako  
Lokatthapasuto thero sadā sotthim karoti no ||

143.

Buddhappasādasampanno pabbajī jinasāsane  
Sañjayo nāma so thero sadā sotthim karoti no ||

144.

Mārañjayo mahāthero rāmaṇeyyo mahiddhiko  
Nibbānaninnacitto so sadā sotthim karotu no ||

145.

Ubho pāpañca puññañca vītivatto anāsavo  
Vīrattherorahappatto sadā sotthim karotu no ||

146.

Puñnamāsamahāthero pañsukūladharo yati  
Pubbakiccavidhim katvā mahāsantim karotu no ||

147.

Pañcachinno pañcajaho pañcacuttaribhāvano  
Pañcasaṅgātigo thero sadā sotthim karotu no ||

148.

Pubbe rāgaṁ vicārento jinabhettiparāyano  
Belaṭṭhasīso vamsadharo sadā sotthim karotu no ||

149.

Pañcuppannāni abhayo nikanti natthi jīvite  
Ajito so mahāthero mahāsantim karotu no ||

150.

Vivaṭṭanissaye puññe katvā sambuddhabhattimā  
Kullattherorahappatto mahāsantim karotu no ||

151.

Vipassī dhammadāyādo thero nigrodhanāmako  
Nibbānāgamasandittho sadā santim karotu no ||

152.

Tisso vijjā anuppatto sugandho nāma sorahā  
Sabbapāparikkhīṇo sadā sotthim karotu no ||

153.

Nandiyo saddhāsampanno jitakleso mahāthero  
Abhiññāpāramippatto sadā sotthim karotu no ||

154.

Kilesā jhāpitā yena jitadhammaratena so  
Kammāraputtavimalo sadā sotthim karotu no ||

155.

Devalokamanussesu anubhutvā vibhūtiyo  
Tissathero mahābhūto mahāsantiṃ karotu no ||

156.

Suvimutto mahānāgo tīhi vankehi muttako  
Sumanāgalo mahāthero mahāsantiṃ karotu no ||

157.

Niraggaļo nirāsāso malakhīlavisodhano  
Vivekābhirato gutto sadā sotthim karotu no ||

158.

Pavivekamanuppatto girimānandanāmako  
Bhāvento kusale dhamme sadā sotthim karotu no ||

159.

Buddhasāsanamāraddho samiddhi bhāvanārato  
Samiddhiguṇasampanno sadā sotthim karotu no ||

160.

Ārādhitajino santo jotitthero mahārahā  
Vimutto sabbasamsārā sadā sotthim karotu no ||

161.

Senāsanāni pantāni sevanto jhānamārabhi  
Chaṭṭabhiñño mahācundo sadā sotthim karotu no ||

162.

Channatthero sahajāto suṇanto jinasāsanam  
Yogakkhemamanuppatto sadā sotthim karotu no ||

163.

Meghiyo buddhuppaṭṭhāko jinabhattiparāyano  
Micchāvitakkupacchedo sadā sotthim karotu no ||

164.

Upavāno mahāthero mahākāyo mahārahā  
Mahiddhiko mahātejo sadā sotthim karotu no ||

165.

Saṅkicco coradamano sabbasamyojanakkhayo  
Pāletu no sabbabhayañ sotthyārogyam dadātu no ||

166.

Pañhabyākaraṇe cheko mettājhānarato yati  
Sopākopāyasampanno sadā sotthim karotu no ||

167.

Khettasampattisampatto vadḍhamānova sotthinā  
Sumano arahā jāto sadā sotthim karotu no ||

168.

Piyo devamanussānam sānutthero bahussuto  
Mettājhāyī tamoghātī sadā sotthim karotu no ||

169.

Yo ca pubbe katañ pāpañ kusalena pidhīyati  
Āngulimālo so thero sadā sotthim karotu no ||

170.

Vipassanādhurā yepi therā samathayānikā  
Khīṇāsavā mahātejā mahātamavinodanā ||

171.

Jhānikājhānikā yepi dhammābhisaṃyādayo  
Sabbe sotthim sadā dentu jayamārogyamāyu no ||

172.

Rattaññūnam bhikkhunīnam gotamī jinamātucchā  
Thapitā aggaṭṭhānamhi sadā sotthim karotu no ||

173.

Mahāpaññānamaggaṭṭhā khemātherīti pākaṭā  
Sāvikā buddhaseṭṭhassa sadā sotthim karontu no ||

174.

Therī uppalavaraṇā ca iddhimantīnamuttamā  
Sāvikā buddhaseṭṭhassa sadā sotthim karotu no ||

175.

Vinayaddharīnam aggā paṭācārāti vissutā  
Thapitā aggaṭṭhānamhi sadā sotthim karotu no ||

176.

Dhammadakkathikapavarā dhammadinnāti nāmikā  
Thapitā aggaṭṭhānamhi sadā sotthim karotu no ||

177.

Jhāyikānam bhikkhunīnam nandātherīti nāmesā  
Aggaṭṭhāne ṭhitā ahu sadā sotthim karotu no ||

178.

Āraddhavīriyānam aggā soṇātherītināmikā  
Thapitā tattha ṭhānamhi sadā sotthim karotu no ||

179.

Dibbacakkhukānam aggā bakulā iti vissutā  
Visuddhanayanā sāpi sadā sotthim karotu no ||

180.

Kuṇḍalakesī bhikkhunī khippābhiññānamuttamā  
Ṭhāpitāyeva ṭhānamhi sadā sotthim karotu no ||

181.

Therī bhaddakāpilānī pubbajātimanussarī<sup>1</sup>  
Tāsamyeva bhikkhunīnam aggā sotthim karotu no ||

182.

Therī tu bhaddakaccānā mahābhiññānamuttamā  
Jinena sukhadukkham sā sadā sotthim karotu no ||

183.

Lūkhacīvaradhārīnam aggā kisāpi gotamī<sup>2</sup>  
Ṭhāpitā aggaṭṭhānamhi sadā sotthim karotu no ||

184.

Singālamātā bhikkhunī saddhādhimuttānamuttamā  
Karotu no mahāsantim ārogyañca sukham sadā ||

185.

Aññā bhikkhuniyo sabbā nānāguṇadharā bahū<sup>3</sup>  
Pālentu no sabbabhaya sokarogādisambhavā ||

186.

Sotāpannādayo sekkhā saddhāpaññāsīlādikā<sup>4</sup>  
Bhāgaso klesadahanā sadā sotthim karontu no ||

### *The Nāgas*

187.

Sumano sumanacalo aravālerapattako  
Campeyyo mucalindo ca kambalo bhujagissaro ||

188.

Kālanāgo mahākālo saṅkhapālo mahodaro  
Maṇikāṇṭho maṇi-akkhi nandanāgopanandako ||

189.

Varuṇo dhataratṭho ca kuṇguvilopalālako  
Citrānāgo mahāvīro chabyāputto ca vāsukī ||

190.

Kaṇhāgotamo bhujagindo aggihūmasikho tathā  
Cūḍodaro ahicchatto nāgā erāpathādayo ||

191.

Āśīvisā ghoravisā ye sabbe nayanāvudhā  
Jalaṭṭhā vā thalaṭṭhā vā pabbateyyā nadīcarā  
Karontu no mahāsothim āyumārogiyam sadā ||

*The Pretas*

192.

Nijjhāmataṇhikā petā ususatti ca lomakā  
Māṃsapinḍādayo petā petā vemānikādayo  
Pālentu no sabbabhayā sadā te sukhino sadā ||

*The Asuras*

193.

Ye pahārādasambara balyāsuragaṇā ca ye  
Vepacittāsuragaṇā candāsuragaṇādayo ||

194.

Sabbe tepi mahātejā bhūtayakkhanivāraṇā  
Karontu no mahāsothim ārogyañca jayam sadā ||

*The Devas*

195.

Ye yakkhā sattasahassā bhummā kāpilavatthukā  
Iddhimanto jutimanto vaṇṇavanto yasassino ||

196.

Sabbe tisaraṇā yakkhā mahesakkhā jutindharā  
Karontu no mahāsothim ārogyañca jayaṁ sadā ||

197.

Chasahassā hemavatā yakkhā nānattavaṇṇino  
Buddhapūjāya niratā sadā sotthim karontu no.||

198.

Sātāgirā tisahassā yakkhā nīlādivaṇṇino  
Nānāpabhāya sampannā sadā sotthim karontu no ||

199.

Vessāmittā pañcasatā yakkhā nānattavaṇṇino  
Iddhimanto jutimanto vaṇṇavanto yasassino  
Modamānā abhikkāmum sadā sotthim karontu no ||

200.

Kumbhīro rājagahiko vepulassa nivesanam  
Bhiyyo nam satasahassam yakkhānam payirupāsati  
So yakkhehi parivāro sadā sotthim karotu no ||

201.

Purimañca disam rājā dhataraṭṭho pasāsati  
Gandhabbānam adhipati mahārājā yasassi so ||

202.

Puttāpi tassa bahavo indanāmā mahabbalā  
So rājā saha puttehi sadā sotthim karotu no ||

203.

Dakkhiṇañca disam rājā viruṭho tam pasāsati  
Kumbhaṇḍānam adhipati mahārājā yasassi so ||

204.

Puttāpi tassa bahavo indanāmā mahabbalā  
Viruļho saha puttehi sadā sotthim karotu no ||

205.

Pacchimañca disam rājā virūpakkho pasāsati  
Nāgānañca adhipati mahārājā yasassi so ||

206.

Puttāpi tassa bahavo indanāmā mahabbalā  
Virūpakkho saputtehi sadā sotthim karotu no ||

207.

Uttarañca disam rājā kuvero tam pasāsati  
Yakkhānañca adhipati mahārājā yasassi so ||

208.

Puttāpi tassa bahavo indanāmā mahabbalā  
Kuvero saha puttehi sadā sotthim karotu no ||

209.

Purimam disam dhatarattho dakkhiñena viruļhako  
Pacchimena virūpakkho kuvero uttaram disam ||

210.

Cattāro te mahārājā samantā caturo disā  
Daddaļhamānā atthamṣu sadā sotthim karontu no ||

211.

Tesam māyāvino dāsā āgum vañcanikā saṭhā  
Māyā kuṭenḍu viṭenḍu vitucca vituṭo saha ||

212.

Candano kāmasettho ca kinnughañdu nighañdu ca  
Panādo opamañño ca devasūto ca mātali ||

213.

Cittaseno ca gandhabbo nañorājā janesabho  
Varo pañcasikho ceva timbarū sūriyavacchasā ||

214.

Ete caññe ca rājāno gandhabbā ca mahabbalā  
Modamānā sadā sotthim no karontu anāmayam ||

215.

Mahantā nāgasā nāgā vesālā saha tacchakā  
Kambalassatarā cāpi merupādasitā balā ||

216.

Yāmunā dhataraṭṭhā ca sabbe nāgā yasassino  
Erāvaṇo mahānāgo no karontu anāmayam ||

217.

Mahiddhikā supaṇṇā ye nāgarāje mahabbale  
Gahetvā jinakhetteva pakkhandimsu nabhe balā  
Te buddhasaranā sabbe sotthim karontu no sadā ||

218.

Paṭhabyāpo ca tejo ca vāyo devā mahiddhikā  
Upacārena nibbattā sadā sotthim karontu no ||

219.

Varuṇā vāraṇā devā somo ca yasasā saha  
Mettākāruṇikā sabbe sadā sotthim karontu no ||

220.

Paṇṇāsayojanāyāme vimāne ratanāmaye  
Thito tame vihantvāna sūriyo sotthim karotu no ||

221.

Cando sītakaro loke pabhāyujjalitodayo

Mahandhakāraviddhaṁsi sadā sotthim karotu no ||

222.

Venḍu ca sahasī devā asamā ca duve yamā  
Candassūpanisā devā devā sūriyanissitā  
Buddhassa māmakā sabbe sadā sotthim karontu no ||

223.

Nakkhattāni purakkhatvā devā mandavalāhakā  
Sakko purindado setṭho sadā sotthim karontu no ||

224.

Mahantā sahabhū devā jalamaggisikhāriva  
Ariṭṭhakā ca rojā ca ummāpupphanibhāsino ||

225.

Varuṇā sahadhammā ca accutā ca anejakā  
Sūleyyarucirā devā devā vāsavanesino  
Dasete dasadhā kāyā sadā sotthim karontu no ||

226.

Samānā mahāsamānā mānusā mānusuttamā  
Khidḍāpadosikā devā devā manopadosikā ||

227.

Athāpi harayo devā devā lohitavāsino  
Pāragā mahāpāragā sabbe devā yasassino  
Dasete dasadhā kāyā sadā sotthim karontu no ||

228.

Sukkā karambhā aruṇā āgum veghanasā saha  
Odātagayhā pāmokkhā āgum devā vicakkhaṇā ||

229.

Sadāmattā hāragajā missakā ca yasassino  
Thanayam āgapajjunno yo disāsvabhivassati ||

230.

Dasete dasadhā kāyā sabbe nānattavaṇṇino  
Iddhimanto jutimanto vaṇṇavanto yasassino  
Modamānā jinadānā sadā sotthim karontu no ||

231.

Lokadhātusahassesu dasasveva samantato  
Devādayo pāṇagaṇā sadā sotthim karontu no ||

232.

Khemiyā kaṭṭhakāyā ca jotināmā mahiddhikā  
Lambītakā lāmasetṭhā sadā sotthim karontu no ||

233.

Jalaṭṭhā ca thalaṭṭhaññe devākāsaṭṭhakādayo  
Yakkhagandhabbakumbhaṇḍā pisācā ye mahoragā  
Mettacittā ca sabbe te sotthim phāsum karontu no ||

234.

Tāvatiṁsā ca ye devā yāmā devā mahiddhikā  
Tusitā ca mahādevā nimmānaratinomarā ||

235.

Vasavattīsu ratīno sabbe devā savāsavā  
Buddhapūjāya niratā sadā sotthim karontu no ||

### *The Brahmās*

236.

Brahmāno pārisajjā ca ye ca brahmapurohitā  
Mahābrahmā ca sabbe te paṭhamajjhānasanṭhino ||

237.

Mettāvihārino santā sambuddhassa parāyanā  
Karontu no mahāsotthim sekkhāsekkhaputhujjanā ||

238.

Parittābhappamāṇābhā brahmā cābhassarā tathā  
Buddhapūjāya niratā dutiyajjhānasanṭhino ||

239.

Mettākāruṇikā sabbe sabbasattahitesino  
Karontu no mahāsantim sotthimārogymāyuvam ||

240.

Parittasubhābrahmāno appamāṇasubhā ca ye  
Subhakīnhā ca brahmāno tatiyajjhānasanṭhino ||

241.

Pabhāya pharanā loke buddhajjhānaratā sadā  
Ahimsā sabbasattesu sadā santim karontu no ||

242.

Vehapphalāpi brahmāno catutthajjhānasanṭhino  
Sekkhaputhujjanāsekhhā sadā santim karontu no ||

243.

Sampatti�ā na hāyanti brahmāno jinasāvakā  
Avihānāmakā sabbe sadā santim karontu no ||

244.

Atappā nāma brahmāno catutthajjhānasanṭhino  
Brahmavihārikā sabbe sotthim phāsum karontu no ||

245.

Sudassā nāma brahmāno bhirūpā jhānabhogino  
Apunāgamanā kāme santim phāsum karontu no ||

246.

Brahmavihārasampannā jinabhāttiparāyanā  
Brahmāno sudassī nāma sadā sotthim karontu no ||

247.

Akaniṭṭhā ca brahmāno jetṭhā sabbaguṇehi ca  
Pahīnabhavanisnehā sadā sotthim karontu no ||

248.

Pathamārūpabrahmāno sabbarūpavirāgino  
Jinabhattratā sabbe sadā sotthim karontu no ||

249.

Dutiyārūpabrahmāno hetṭhājhānavirāgino  
Jinabhattratā sabbe sadā sotthim karontu no ||

250.

Tatiyārūpabrahmāno hetṭhājhānavirāgino  
Jinabhattratā sabbe sadā sotthim karontu no ||

251.

Catutthārūpabrahmāno hetṭhājhānavirāgino  
Jinabhattratā sabbe sadā sotthim karontu no ||

*Living Beings Collectively*

252.

Vedeheparagoyāne jambūdīpe kurumhi ca  
Devayakkhapisācehi saddhim vijjādharādayo ||

253.

Ākāsaṭṭhā ca brahmāno jalatṭhā cantalikkhajā  
Dvipadādayo ye sattā sadā sotthim karontu no ||

*Power of the Three Jewels*

254.

Mārasenavighātassa jinassa sukhajhāyino  
Tejobalena mahatā sadā maṅgalamatthu no ||

255.

Nānāguṇaviccittassa rūpakāyassa satthuno  
Sabbadevamanussānam mārabandhavimocino  
Mettābalena mahatā sadā maṅgalamatthu no ||

256.

Sabbaññutādikāyassa dhammakāyassa satthuno  
Cakkhādyagocarassāpi gocarasseva bhūriyā  
Tejobalena mahatā sabbamaṅgalamatthu no ||

257.

Rūpakāyasadisassa nimmitassa mahesino  
Dhammassa vattuno sagge devānam sugatā pati  
Tejobalena mahatā sadā maṅgalamatthu no ||

258.

Sikkhitvā mānuse deve mocayitvā sadevake  
Saṅkhāre pajahantassa nibbutassa mahesino  
Mahantenānubhāvena sabbamaṅgalamatthu no ||

259.

Caturāśītisahassa- dhammadikkhandhassa tejasā  
Navaṅgasāsanassāpi navalokuttarassa ca  
Sabbapāpapavāhena sabbamaṅgalamatthu no ||

260.

Mahatoriyasaṅghassa puññakkhettassa tādino  
Pahīnasabbapāpassa sīlādikkhandhadhārino  
Mahātejānubhāvena sabbamaṅgalamatthu no ||

### *Powers of Various Devas*

261.

Pātāle bhūtalākāse devayakkhapisācakā  
Vijjādharā ca gandhabbā nāgakumbhaṇḍarakkhasā

Sabbesamānubhāvena sabbamañgalamatthu no ||

*The Power of the Uppātasanti Gāthā*

262.

Icevamuppātasantim yo vadeyya suṇeyya vā  
Vijeyya sabbapāpāni vuddhattañca bhavissati ||

263.

Sotthikāmo labhe sotthim sukhakāmo sukham labhe  
Āyukāmo labheyyāyum puttakāmo labhe putte ||

264.

Na tassa rogā bādhenti vātapittādisambhavā  
Akālamaraṇam natthi na devo visamosare ||

265.

Na cuppātabhayam tassa nopi patta bhayam tathā  
Nassanti dunnimittāni pāpakammaṭṭhitāni ca  
Dīghamāyu mahāsotthim ārogyañca sadā bhave ||

266.

Yo sutvāpi mahāsantim saṅgāmam pavise naro  
Vijaye verino sabbe na satthehyabhibhūyate ||

267.

Sabbadā labhate pītim vipattim nāvagāhati  
Rogehi nābhibhūyate savatthūhi vivadḍhate ||

268.

Yatra dese vakovakā bālhakā rakkhasādayo  
Uppātasantighosena sabbe tattha samanti te ||

269.

Yamuddissa vade santim sajīvañcāpyajīvitam  
So mucate mahādukkhā pappoti sugatim sadā ||

270.

Devatṭhāne nagare vā niccamuppātasantiyā  
Pālakā devarājāno tejasirīvivadḍhanā ||

271.

Pathabyāpādisañjātā uppātā cantalikkhajā  
Indādijanituppātā pāpakammasamutṭhitā  
Sabbuppātā vinassanti tejasuppātasantiyāti ||

*Uppātasanti niṭṭhitā*

Thai text: [www.wattamaoh.com/download/](http://www.wattamaoh.com/download/) อุปปัตสันตि.pdf